

**Uunga siunnersuut: Aatsitassat pillugit ingerlatallu tamatumunnga pingaarutillit
pillugit inatsisartut inatsisaat (aatsitassanut ikummatissanullu inatsit)
allangortinneqarneranik Inatsisartut inatsisaat nr. xx, yy 2016-imeersoq.**

Aningaasaqarnermut Aatsitassanullu Naalakkersuisumit saqqummiunneqartoq

pillugu

Aatsitassanut Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Aatsitassanut Ataatsimiititaliap suliarinninnermini ilaasortarai:

Inatsisartunut ilaasortaq Jens-Erik Kirkegaard, Siumut, siulittaasoq
Inatsisartunut ilaasortaq Múte B. Egede, Inuit Ataqtigiit, siulittaasup tullia
Inatsisartunut ilaasortaq Karl-Kristian Kruse, Siumut
Inatsisartunut ilaasortaq Poul Hansen, Demokraatit
Inatsisartunut ilaasortaq Siverth K. Heilmann, Atassut
Inatsisartunut ilaasortaq Per Rosing-Petersen, Attaviitsoq
Inatsisartunut ilaasortaq Kalistat Lund, Inuit Ataqtigiit

UKA 2016-imi ulloq 26. septemberimi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Allanguinissamik pitsanngorsaanissamillu kissaatit arlallit aatsitassarsiorluni annikitsumik ingerlatat pillugit 2015-imi aalajangersimasumik sammisaqaqatigiinnermi ilaatigut saqqummiunneqartut siunnersuutikkut piviusunngortinniarneqarput. Aammattaaq aatsitassanik nalituunik arlalinnik annertunerusumik katersisinnaanerup akuersissutigineqarnissaa pillugu aalajangiiffigisassatut siunnersuut UPA2016-imi akuerineqartoq siunnersuutikkut piviusunngortinneqassaaq.

Siunnersuutip Inatsisartuni siullermeerneqarnera

Siunnersuut siullermeerneqarami annertuumik taparserneqarpoq.

Tusarniaanermut akissutit

Siunnersuut 2016-imi 13. maajimit 17. juunimut tusarniutigineqarpoq. Tusarniaanermut akissutit tiguneqartut kiisalu tusarniaanermut akissutit tunngavigalugit siunnersuummi allannguutit siunnersuummut nassuiaatini Naalakkersuisunit nassuiaatigineqarput. Tassunga atatillugu siunnersuummi iluarsisassatut kissaatit tusarniaanermi saqqummiunneqartut Naalakkersuisunit annertuutigit malinneqarsimasut Aatsitassanut Ataatsimiititaliamit oqaatigineqarsinnaavoq. Tusarniaanerup annertunerusumik oqaaseqarfiginissaanut ataatsimiititaliaq tunngavissaqarsorinngilaq.

Siunnersuutip ilusilerneqarnera – Allannguutissatut siunnersuummik saqqummiussinissamik qinnuiginninneq

Siunnersuutip danskisuuani oqaaseq ”hjælpe midler”, matumunnga tunngatillugu ima paasineqartariaqartoq ”redskaber”, kalaallisoortaani ”ikiorsiissutit”-nik taaneqarsimasoq siullermeerinnermi tikkuarneqarpoq. Tamatumunnga taarsiullugu kalaallisuuani oqaaseq ”sakkut” atorneqartariaqartoq siullermeerinnermi oqaatigineqarpoq.

Oqaatigineqartunut atatillugu inatsimmi atuuttumi oqaaseq atorneqartoq ataatsimiititaliap misissorpaa oqaatigisinnaallugulu oqaaseq ”sakkut” manna tikillugu atorneqartarsimasoq, tamannalu §§ 36, 38 aamma 45 a-mi atorneqarsimalluni. Siunnersuutikkut aalajangersakkat marluk oqaatsimik ”sakkut”-mik atuiffiusut (§§ 36 aamma 38) allanngortinneqarput, siunnersuutikkulli § 45 a allanngortinneqarnani. Taamaattumillu siunnersuut taama iluseqartillugu akuerineqassappat aalajangersakkat ”sakkut”-nik ”ikiorsiissutit”-nillu atuiffiusut qanoq paasineqarnissaat paatsuungassutaalersinnaavoq.

Aammattaq oqaaseq ”sakkut” oqariaatsimut pineqartumut atussallugu eqqornerusutut isigineqarmat pingajussaaneerinninnissaq sioqqullugu allannguutissatut siunnersuummik saqqummiusseqqullugit Naalakkersuisut ataatsimiititaliamit qinnuigineqassapput, tamatumani siunertarineqarluni siunnersuutip kalaallisoortaani oqaatsit (sakkut) atorneqartut assigiissaarneqarnissaasa qulakkeerneqarnissaa.

Ilitsersorneqarnissap suli pisariaqartinneqarnera

Periarfissat killilersuutillu aatsitassarsiornermut inatsisiniittut pillugit innuttaasut inuussutissarsiutinillu ingerlataqartut ilitsersorneqarnissaat anguniarlugu Naalakkersuisut suliaqalereersut ataatsimiititaliamit ilisimaneqarpoq. Inatsisinik allannguutaasunik akuersissuteqarnermi inatsisit ataatsimoortillugit pisortatigoortumik allanneqartanngimmata innuttaasut inatsisip imarisaanik ilisimasaqarnissamik atuinissamillu kissaateqartut inatsisit pisariunerat pissutigalugu unammilligassaat annertunerulersippaat. Taamaattumillu aatsitassanut inatsisikkut periarfissiissutigineqartunik sapinngisamik amerlanerpaat atuinissamut periarfissinneqarnissaat siunertaralugu ilitsersuinermik suliniuteqarnerup nangingneqarnissaanik nukittorsarneqarnissaanillu Naalakkersuisut ataatsimiititaliamit kaammattorneqarput.

Siunnersuutip aningaasaqarnikkut kingunerisassai

Siunnersuutip piviusunnngortinneqarnerani aningaasaqarnikkut kingunerisassat siunnersuummut nalinginnaasumik nassuiaatini allaaserineqarput. Siunnersuut innuttaasunut, inuussutissarsiutinik ingerlataqartunut pisortanullu aningaasaqarnikkut allaffissornikkullu annertuumik kinguneqartussatut naatsorsuutigineqanngitsoq tassani oqaatigineqarpoq. Tunngavissat pigineqartut tunngavigalugit allatut isummernissaminut ataatsimiititaliaq tunngavissaqarsorinngilaq.

Inassuteqaat

Ataatsimiititaliap isumaqatigiittup siunnersuut **akuerineqassasoq** inassutigaa.

Taama oqaaseqarluni isumaliutissiisummilu allassimasutut paasinnillu ataatsimiititaliap siunnersuut aappassaaniigassanngortippaa.

Jens-Erik Kirkegaard,
Siulittaasoq

Múte B. Egede

Karl-Kristian Kruse

Poul Hansen

Siverth K. Heilmann

Per Rosing-Petersen

Kalistat Lund

